



Шочмо эл, порылык да чын верч!

Будь готов!

1-ше (3649) №,  
2024 ий 5 январь,  
кугарня.



0+

# Имде лий

1933 ий 1 февраль годсек лектеш.

## Дракон еш пиалым сора



2024 ий –  
Ешын идалыкше.



Устел йыр погынен шин-чын, тутло сийым тамлен, икте-васылан сай тыланымашым ойлен, кавашке тюрлө тус дене волгалтше фейерверкым колтен, кажне ешыште У идалыкым вашлийыныт. Мемнан деке унала поро кумылан, еш пиалым сoryшö Ужар Пу Дракон толын.

Юзо шүлышан пайремым йоча-шамыч поснак вученыт. Йошкар-Ола гыч Соколовмыт ешыште (снимкыште) У ийлан кажне ийын кыртмен ямдылалтыт. Тувраш марте шушо кожым еш дене сыл-

нын сорастареныт. Тюрлө тусан гирляндым чуктен, кож йыр шогалын, мурым муреныт, куштеныт, почеламутым каласкаленыт. У ийым чылан пырля вашлиймаш Соколовмытын поро йулаштлан шотлалтеш. Икоян еш пыжашыште кушшо йоча-влаклан сегы-машке шуаш йон утларак пуалтеш. Арам огыл Россий Федерацийын Президентше В.В.Путин 2024 ийым Ешын идалыкше семын увертарен.

Соколовмыт ешыште кум чолга эрге кушкеш. Максимлан миф сынан янлык мот-

коч келша, садлан йочасадысе пайремыште дракон лийын. Дима идалыкын озажым лего гыч погаш шона. А Рома дракон нерген онгай почеламутым тунемын.

– У ий – эн вучымо пайремна. Йижтö Кугызалан серышым кажне ийын возена. Тудо шонымашнам эре шукта. Дракон мыланна кече еда куаным да пиалым полеклаш туналеш маньын ушанена, – ойлат рвезе-влак.

Умбакыже 4-ше лаштыкыште лудса.



## Куан – воктенак



Фотом школ архив гыч налме.

Класс вуйлатышына Э.Г.Степанова мыланна чапле у ий пөлекым ыштен. Кудымшо классыште тунемше-влакым Йошкар-Ола воктене верланыше «Чудо-кони» имне спорт комплексыш экскурсий дене намиен **(снимкыште)**. Ару, ушан да түрлө урлык имным орын онченна. Нунын шке кече режимышт уло: тренировкым эртарат, массажым ыштат, түрлө кочкыш дене сийлат, душышто мушкыт. Имне үмбаке шинчын онченна. Ныл йолан йолташ-влак дене вашлиймаш поро шарнымашым коден.

**Вероника САВЕЛЬЕВА.**

**Советский, Михайловка.**

## Мардежла эртен

**Историйым шергалына**

*Руш-турко сар  
годым (1877-1878)  
1878 ий  
7 январьыште  
Шейново воктене  
кредалмаште руш  
войска турко  
армийым кырен  
шалатен. Ты  
сеңымаш сарым  
мучашлаш полшен.*

**Пашазын кидешы-  
же күртнӧ шуалга.  
Калыкмут.**

Йоча-влакын эн йоратыме пай-ремышт – У ий. Тудо кажнын чонышкыжо юзо шӱлышым пурта. Тыгодым идалыкымат иктешлаш жап. 2023 ий моткоч писын, чылт мардежла эртен, шижынат шуктен омыл. «Ямде лий» газет редакцийын таумутым кучыктымжо, «Марий юнкор» слётыш ўжмыжӧ да тушто шуко йолташым мумем шарналт кодыныт. Тыгак «Юнармия» военно-патриотический мер толкынынш ушнымем чоным ырыкта. Дракон идалык деч тазалыкым, пиалым, вуй ўмбалне яндар кавам йодам.

**Юля ЯГОДАРОВА.**

**Советский, Кельмаксола.**

## Йомак полатыш

Ме 2-шо классыште тунемше-влак дене пырля йомак полатым ушештарыше Республикысе курчак театрышке миенна. Тушко шукынжо у ий костюм дене вашкеныт. Мый бэтмен лийынам **(снимкыште)**. Эн ончыч ме «В гостях у Дедушки Мороза» представленийыште кож йыр муренна, куштенна. «Семья для мамонтёнка» йомакым куанен онченна. Тыгак мыланна театр мучко экскурсийым эртареныт. Йомак полат сӧраллыкше дене ӧрыктарен. Фотом ышташ келшыше верже могай гына уке! Садлан йывырген войзалтынна. Фотом ий мучко куанен ончена.

**Костя ШЕХУРДИН.**

**Шернур, Кукнур.**



Фотом еш архив гыч налме.

## Российысе увер

**5-11-ше класслаште тунемше-влак, «Знаешь? Научи!»** всероссийский конкурс ушныза. Шкендам научно-популярный блогер семьи тергыза. Видеом [nauka.homo-science.ru](http://nauka.homo-science.ru) сайтыш **5 февраль марте** верандьман.

**11-19 ияш ўдыр-рвезе-влаклан «Наука без границ»** тўнямбал сўрет конкурсым увертареныт. «Скрытые чудеса глубин» теме дене сўретым сўретьлыман. Тўрыс увер – [livingoceansfoundation.org](http://livingoceansfoundation.org) сайтыште.


Эссем возаш кумылан улыда? Тугеже **«Волонтёры финансового просвещения»** всероссийский конкурс – тыланда. Пашам [bo@fincubator.ru](mailto:bo@fincubator.ru) адрес дене электрон почтыш **29 февраль марте** колтыза.

## Марий Элысе увер

Йошкар-Олаште **«Красота»** кызытсе жаплан келшыше сымыктыш фестиваль эртаралтеш. **Брюгге энерўмбалне** сўрет дене палыме лияш, мотор арверлам, сӧрастарышым, вургемым налаш лиеш. Йоча-шамычлан **«Сказка»** модыш пӧлем уло.

**«Ший Пампалче»** марий йомак да калык усталык тоштерыште **«Йомаксола»** ончер почылтын. Тушто түрлө технике дене ямдылыме курчак-влакын пӧртыштым ончаш лиеш. Выставке **29 февраль марте** шуйна.

**7 январьыште «Корта»** тунемме да тренировкым эртарыме базыште ече дене Марий Эл Республикын первенствыже эртаралтеш. Ушнаш йодмашым [orgeo.ru/event/32386](http://orgeo.ru/event/32386) ссылке дене **6 январь марте** колтыман.



## Ўшанем

Мемнан ден  
Кролик чеверласыш,  
Кўлеш Драконом  
вашлияш.  
Шарнаш кодеш  
мыняр поянлык  
Школ илыш,  
мер паша гычат.

Мыняр вученна ме  
У ийым!  
Пиалым, лайым,  
сайым, шийым,  
Тазалькым да еш перкем  
Ах, пөлекла ман ўшанем.  
**Настя МИХАЙЛОВА.**  
Волжский, Кугу Корамас.



Ирина ЕГОРОВАН сўретше.  
Медведево, Рузм.



Фотом школ архив гыч налме.

## Шорыкйоллан - чевер пўкш

Орша школышто 1-4-ше класслаште тунемше-влак дене пырля «В гостях у Пампалче. Праздник Шорыкйол» республикысе сетевой проектышке ушненна. Командым чумырен, васликува ден васликугызан вургемыштым ямдыленна (**снимкыште**). Ты пайрем йўла нерген кочакова-шамыч деч ятыр йодыштынна. Шорыкйол пўкшым кўэштынна. Тидлан 300 грамм йошкарушмен, 200 грамм уржа ложаш, ик муно, ик кугу совла сақырложаш, ик изи совла шинчал кўлыт.

Йошкарушменым мясорубко гоч колтенна, шинчалым, сақырложашым, муным ешаренна да сайын лугенна. Вара, ложашым ешарен, сайын нōштылынна да изи ужашлан шеледенна. Руашым пōрдыктен, изи пўкшым ыштенна. Тудым, салмаш пыштен, духовкыш шынденна. Конгада уло гын, эшеат сайрак. Ожно тыгай пўкшым васликува ден васликугызалан пуэденйт. Жапнам пеш онайын да веселан эртаренна.

**Р.Г.АНТРОПОВА.**  
Советский район.

*Марла календарь почеш 2024 ий Йўксō идалык лиеш. Йўксō – ик эн мотор кайык. Тудо волгыдылыкын, яндарлыкын, аралтышын символжылан шотлалтеш. Йўксō идалык калыкын икоян да поро кумьлан лийшашыжым сōра. Волгыдо кайык мемнам аралыже манын, тудын кўлешлыкшым палдарыман. Мутлан, мōнгышкō йўксō фигурым налаш, пырдыжеш сўретым сакалаш, эсогыл телефонышкат ты кайыкым вераңдаш лиеш.*

### Палаш онай

## Йўксō

- ❖ 24-26 ий марте ила.
- ❖ Нелытше 15 килограммыш шуын кертеш.
- ❖ Мужыр дене илат.
- ❖ Вўдыштō кушшо шудым, ужавам, колым да шукшым кочкеш.
- ❖ Чонештылше кайык-влак кокла гыч ик эн кугулан шотлалтеш.
- ❖ Ик суткаште 1000 километр утла кужытыш чонештен кертеш.
- ❖ Вес йўксым да чўчкыдын ужмо еным шарнен кодеш.



- ❖ Кугу кайыкын капыштыже 25 тўжем наре пыстыл уло.

## Марий салтаклан - салам!



Фотом школ архив гыч налме.

Арбор школышто 6-шо классыште тунемше-шамыч (**снимкыште**) «У ий дене» видеосаламлымаш конкурсышто вийнам тергенна да сеныше-влак

радамыш лектынна. Ме Украиныште элнам аралышешамычлан видеосаламлымашым ыштенна. Кажне йоча поро тыланымашым ойлен. Чон ласкалыкым, пенгыде тазалыкым, пиалым, патырлыкым, вуй ўмбалне канде кавам да сенымаш дене шочмо суртыш пōртылаш тыланенна.

**Марий Турек район.**

**Ульяна ФЁДОРОВА.**

# Дракон еш пиалым сөра

Тўғалтыш – 1-ше лаштыкыште.

Соколовмыт Йошкар-Олаште илат гынат, марий шўлышан, йўлам жаплыше улыт. Вате-марий лу ий утла икте-весым йоратен, икте-весылан эгертен илат. Марина Викторовна тўғалтыш класслам туныктышылан пашамыштен, кызыт сурт сомылкам шукта. Константин Юрьевич рўдоласе ик компанийыште фрезировщиклан тырша.

## Кум патыр

Изаак-шоляк-влак (снимкыште) иканыште ончалмаште чылт йыгырла чучыт. Кугуракше – **Дима** – Йошкар-Оласе 31-ше номеран школышто 4-ше классыште тунемеш. Математике предметым поснак йората. Онлайн-олимпиадыште ушакылжым терга. Йолташыже-влак дене волейболла, футболла талын модеш. Лего гыч түрлө машинам, танкым погаш кумылан. Аважлан шольжо-влакым ончаш полша.

Кыдалаш эрге, **Максим**, 1-ше классыште тунемеш. Дима изаж семынак леголан шўман. Изи арверла гыч техникым шке гыч шонен луктеш. Шукерте огыл шудым сольшо тракторым чумырен. Сылне муро почеш кушташ йората. Пилот лияш шона.

Ныл ияш **Рома** 43-шо номеран «Жар-птица» йочасадыш коштеш. Ача-аван ойлымышт почеш, кеч-кө дене кылым куштылгын ышта. Мыйын мийыдем годымат вожылын ыш шого. Тунамак шкеж дене палдарыш, кидыш микрофонным налын, ава нерген почеламутым марла артистла лудо. Тидым видеошто QR-код пол-



Авторын фотожо.

шымо дене ончен кертыда. «Сылнымут арпаш» оласе конкурсышто почеламутым сылнын лудмо мастарлыкшым шукерте огыл терген. Камер ончылно шкенжым чолган куча, түрлө видеом шкеак сниматла. *«Мый блогер але полиций пашаен лийнем»*, – ойла Рома.

Рвезе-влак яра жапышт годым, шке гыч шонен луктын, шкешотан изирак спектакльым ончыктат. Сценарийым возат, рольым шеледат. Тыге ача-аваштын кумылыштым нөлтат. Марина Викторовна рвезе-влак коклаште шкетын. Тидын шотышто ава тыгерак каласыш: *«Тый мемнан принцессына, королевына улат маньын, мыйым куандарат»*.



Чылан пагалат да йоратат. Шкемым эн пиаланлан шижам».

## Пайремлен канат

Соколовмыт пүртүс коклаште лияш йоратат. Йон лийме семын ялышке коштыт. Ача-авалан сурт сомылкам ворандараш, шудым ямдылаш полшат. Марий пайремым пайремлымашым кугезе коча-кова-шамычын йўлаштым умбакыже шуйымылан веле огыл, тыгак шкешотан каньшлан шотлат. Шорыкйоллан васликува, васликугыза лийыт, калыкым куандарат, шкештат веселаныт. Уярнялан тутло мелнам кўэштыт, курык гыч мунчалтат, уярнякувам йўлалтат. Пеледыш пайремышке уло еш дене ушнат.

– *Марий пайрем-влак йочашамычым утларак марий шўлышаным кушташ полшат. Тылеч посна мөңгыштат шочмо йылме дене кутырена. Мыйын шонымаште, еш кугу лийшаш. Ешыште икте-весым уммылман, ваила полшыкалыман. Кеч-могай ойгым тўжикан сенаш куштылго*, – ойла Марина Викторовна.

**Х.ТОКПУЛАНОВА**

## Эн шерге

Ава эн шерге ты тўняште,  
Шинчасортала тудым аралем.  
Эрден, кастен – эре пашаште,  
Сай отметкем ден со куандарем.

Чылт кече гае тудо ырыкта,  
Да мурым сылнын мыланна мура.  
Эн тамле сийым кечын ямдыла,  
Тудлан ме таум эреак ойлена.

**Даша ВИНОГРАДОВА.**

**Кужэгер, Шўдымарий.**

## Вика ден Костя

Мыйын Вика шўжарем ден Костя шольым улыт. Шўжарем идалык тўғалтыште куд ийым тема. Тудо изи капан, күреналге ўпан, канде-ужар шинчан. Чылт Лумўдырла коеш. Вика кеч-момат шкевуя ышташ тырша. Костя – пеш тыршыше рвезе. Тудо кочалан тракторым ачалаш полшаш кумылан. Кажне уроклан сайын ямдылалтеш, ача-аванам «нылытан» да «визытан» отметкыла дене куандара. Костя ден Викам моткоч пагалем.

**Оксана АНДРЕЕВА.**

**Морко, Коркатово.**



# 2024 ийлан йоча гороскоп

## Шорык (21.03-20.04)

Моткоч чолга, ум палаш тыршыше, чыла вере шуаш йората. Лұдықшыдымылык-шө шотышто тұтқырак лийман. Пеш писын кушкеш. Кеч-могай пашам шкевужа шукта, тидлан чаракым ыштыман огыл. Спортышто, куштымаште кугу күкшытыш шуэш.



## Презе (21.04-20.05)

Чыла шке «тамлен» ончаш кумылан. Ача-ава-влак тореш лийыт гын, шортеш, кычкыра. Ик вере шинчаш ок йорате. Усталык шўлышан, кидпашалан шўмангдаш лиеш. Тунеммашым да ончыкылык профессиим ойырымашым тўнт верыш шында.




## Йыгыр (21.05-21.06)

Тўшкаште лияш йората, йолташыже шуко. Шкетынат жапым пайдалын эртара: пластилин дене ненча, сўретла. Чонлан келшыше кружокыш але секцийыш возалташ кўлеш. Тунеммаште нелылык лектын кертеш, садлан тидлан шуқырак жапым ойырыман.



## Рак (22.06-22.07)

Кыртмен тунемаш тырша, но йолташыже-влак дене кыл лушкыдырак. Тидлан кумылжо волен кертеш. Йон лийме годым тўшка пашашке ушыман, чонлан келшыше сомылым муман.



## Лев (23.07-23.08)

Тўрлө кундем нерген книга м лудаш да онгай передачым ончаш кумылан. Тений шочмо республикысе сылне верлам ончен кошташ да тора олашке миен толаш йон лектеш.



## Ўдыр (24.08-23.09)

Йочалан чыла онгай, эсогыл йот йылмым тунемаш тўналеш. Но школышто тунемме предмет-влаклан шагалрак жапым ойыра. Йон уло гын, репетиторым муман але тўрлө усталыкым вияндыме студийыш возалтман.



## Виса (24.09-23.10)

Чытыше, виян улмыжо, пўсө уш-акылже дене ойыртемайтеш. Кечмогай пашам писын ышта да сенгымашке шуэш. Тений шуко конкурсышто ончыко лектеш да сылне верлам ончен кошташ йон лиеш.



## Скорпион (24.10-22.11)

Тўрлө аланыште усталыкшым вияндаш тырша, яра жапше йоршын уке. Коклан каналташ кўлеш. Тазалык дене нелылык лектын кертеш. Йолташ-влак дене яндар южышто шуқырак коштман. Спорт дене кылым кучыман.



## Пикшызе (23.11-21.12)

Моткоч уста, но мастарлыкшым калык ончылно ончыкташ аптырана. Тўналтыште онлайн конкурсышко ушнаш лиеш. Изи ошкыл дене ончыко каен, кугу сенгымашке шуын кертеш.



## Ирказа (22.12-20.01)

Тений чыла шонимашыже шукталтеш. Но тунеммаште нелылык лектеш, тыгодым кумыл волышаш огыл. Ача-авалан, туныктышылан энгертыман. Чоным лыплан-дараш зарядкым ыштыман, спорт дене кылым кучыман.



## Вўд йоктарыше (21.01-20.02)

Лидер койышыжо, яндарын кутырымыжо кугу сенгымашке шуаш полшат. Шонимашыже ятыр, тыге проект пашалан кумылангеш да тудым илышыш шынгараш тўналеш. Йолташыже-влак шукемыт.



## Кол (21.02-20.03)

Шўдыр-шамыч корныжым волгалтараш сўрат. Кол ончыкыжым тале шымлызе лийын кертеш. Ты аланышке тений икымше ошкылым ышта. Шымлыме паша конкурс ден конференцийыште чўчкыдын сенгышыш лектеш.



# Кум кож

Чодырасе изолыкышто кум мотор кож кушкеш. Нуно иктесышт дене мутланаш йоратат.

– Ах, таче могай сай. Тымык, мотор!

– Туге. Кужу жаплан веле огыл, очыни.

– Молан?

– Кузе молан? Вашке У ий шуэш!

– Пеш сай!

– Тый куаненат? Теве ег-влак товарышт дене толыт да мемнам руэн нангаят. Тунам курымешлан шып лийына.

– Тымык лиеш гын, сайыс.

– Мо сайже? Тыйым тўн гычак руалыт гын, йывыртет?

– Тыге ыштен кертыт? – Изи кож лўдмыж дене тўршталтенат колтыш.

– Кертыт шол...

Руалыт да тыйым пайремышке нангаят. Тушто моторын шогаш тўналат.

– Ура! Мый пайремыш логалам!

– Эше нимомат от умыло. Пайрем пыта – нигўлан кўлдымыш савырнет. Иктаж-кушко нангаен кудалтат.

– Тыге ыштен кертыт?

– Тыгак ыштат. Тыйын йыр мурат, куштат. Пайрем эрта – имет йогаш тўналеш. Тыгай кўлан вара кўлат?

– Мыйын колымем ок шу-у-у, – шортеш Изи кож.

– Шогыза, ме кажне ийын лўдын ылышаш улына мо? Ала лесникым мемнам утараш йодына?!

– Чын, ўмаште мемнам шылтен кодыш. Ёмбакна кукшо укшым, лумым опыш.

– Пошкудо изолыкышто иканаште кум кожым руэн нангайышт вет!

– Молан чодыра оза нуным шылтен огыл?

– Эх, чыланнам шылтен ок керт... Чодыраже кугу. Изиракшым эше утарен кертеш.

– Тыланет сай, эше изи

улат. А ме тений палынак нўлталамтынна.

– Изи манат? Ик ий ончыч иканаште тыгай лу изи кожым руэн нангайышт.

– Ой, молан лўдыктеда?

– Ме чыным ойлена.

Изолыкыш лесник толын лектеш да кож-влакым тўткын онча:

– Ёлташем-шамыч, кузерак ылыштыда, чылан верыштыда улыда? Ах, могай мотор кушкын шогалында!

Изи кож дек лишемеш да ойла:

– Ой, колоем-влак. Тендам осал ег-шамыч деч кузе аралаш? Тыйжым шылтен



кодем, укшым, лумым ўмбакет оптем. Кугуракше-влак дене мом ышташ? Мўнгышкем кайышаш, ала иктаж-мо ушышке толеш.

Тиде жапыште изолыкыш Мераҥ ден Ур-влак кудалын толыт.

– Салам, Ур-шамыч! Салам, Мераҥ-влак! Могай увер уло?

– Ёлташ-шамыч, вашке пайрем шуэш, монден огыдал?

– Пеш шарнена да ойгырена. Ёмаште ик изолыкышто У ийым пайремленна ыле. Тушто чыла кожым руэн пытареныт.

– Кузе тыге? Чыла-чыла руэныт?

– Чыла, шке миен толза.

– Мемнан изолыкна огеш келше мо? Ончалза, меат мотор улына.

– Тендамат руат гын, вара мом ыштена?

– Те чодыра оза дек миен



толза. Тудынат кумылжо волен. Мемнам утарынеже, но кузе? Ёршын ок пале. Тудлан полшыза! Мемнам утарыза!

– Кайышна!

Мераҥ ден Ур-влак чодыра оза дек кудалыт.

– Поро кече, кочай! Ме кож-влакым утарынена, но мом ышташ, огына пале. Вашке – У ий. Чыла пушенгым руат гын, ме кушто юарлаш тўналына?

– Ёмашсе верыште чыла кожым руэныт.

– Пошкудо изолыкыштат мотор вет. Нуным кузе-гынат арален кодаш кўлеш. Кажне ийын кожым руат гын, чодыражат ок лий!

– Кож-шамычат моткоч ойгырат, мемнан деч польшышым йодыт.

– Ур-влак, Мераҥ-шамыч, лыпланыза. Ме тўшкан гына полшен кертына. Келшеда?

– Ура-а, уло кумылын!

– Пеш сай, тугеже колыштса. Айста кож-влакым кўреналге-йошкар тўс дене чиялтена. Ег-шамыч, нуным ужын, черле улыт манын шонат да огыт тўкў.

– Кочай, чия нунылан энтеким ок ыште?

– Уке! Ме поро чиям кучылтына. Жап эртымеке, лум дене мушкылтеш, да кож-влак уэш ужарге лийыт.

– Пеш онайын шонен муынат, кочай!

Тўшкан погынен, чодырасе чыла изи кожым чиялтат. Тыге У ий пайремат эрта. Ег-шамыч ик кожымат огыт тўкў. Ёнде нуно идалык мучко лўдде илен кертыт.

**Юлиана ИБРАЕВА.**

**Кужэҥер, Топкавлaк.**

Палаш оңай


Озан олан символ-жылан ожны-секш ул-дыран кишке але дракон шотлал-теш. 1781 ийыште Екатерина II императрице вуйлатыме годым гербыште тыге возымо лийын: «Змий черный под короною золотую, Казанскою, крылья красные». Ала-кунам Озан олмышто кишке-влак шолыныт, маныт. Нуным пытараш юзым ўжыныт. Но Зилант кишке кугыжа тораште огыл верланыше Джилантау курыкыш чонештен. Тыге утаралт кодын. Кишкым лўддымō патыр веле чактарен кертын. Тылеч вара кишке-дракон Озан олам тургыжландарымым чарнен. Зилантлан 2003 ийыште Бауман уремыште шарныктышым шогалтеныт.




Мут-влакым марлашке кусарыза.

- 1.Лето. 2.Орёл. 3.Ольха.
- 4.Иголка. 5.Козлёнок. 6.Груздь.
- 7.Близкий.

Никита ХАЛТУРИН. Советский, Ёрша.



Сур пире ден чоя рывыж у ий марафоньш ушненыт. Коктынат 1 январьыште 12 шагатат 30 минулган у ий кож воктеч тарваненыт. Пире Лукоморьеш 4 январьыште 2 шагат кечывалым миен шуын, Рывыж – 5 январьыште 6 шагат эрдене. Рывыж корнышто мыняр жап лийын? Пире мыняр жаплан ончылтен?



Стефания ХОРОШАВИНАН сўретше.

Медведево, Руэм.

Чын дракон гаяк

Шуко егын йоратыме пайремже – У ий. Мыланемат тудо пеш келша. Еш дене кожым, пörтым сōрастаренна. Кажне ийын школыштына пайрем эртаралтеш. Класс дене номерым ямдылена, кид кучен, кож йыр пörдын, мурым мурена, куштена. А эше авам шке кидше дене мотор, öрыктарыше вургемым урген чикта. Идалык могай янлыклан пöлеклалтеш – тугайым ямдыла. Авам кидпашам моткоч йöрата. Саша ден Андрей изам-влаклан агытаным, колям, имньым, кишкым да моло янлыкым шарныктарыше оңай вургемым урген. Школышто тунеммышт годым ойыртегалтше костюмым чийымышт дене эре икымыше вер дене палемдалтыныт. 2024 ий – Дракон идалык. Мыят, драконын вургемжым чиен, кож воктене фотом ыштышым (снимкыште). Чыладам волгыдо У ий пайрем дене саламлем. Тек Дракон идалык шуко куаным конда. Сенгымашлан поян лиш.



Фотом еш архив гыч налме.

Николай ЯКИМОВ.

Тушто

- \* Име деч посна – урга, шүртö деч посна – тўрла.
- \* Писын кушшо чодырам чыла ошо.
- \* Ик пуда деч посна, ик она деч посна вўд гоч кўварым кўварлышым.

М. ШКЕТАН ЛўМЕШ МАРИЙ КУГУЖАНЫШ ДРАМЕ ТЕАТР ЯНВАРЬ

26	<b>ЙЫВАН КЫРЛА. ПУТЎВКА В ЖИЗНЬ</b>	С.Пектеев
18:00	Документальный драме	18+
27	<b>ТОЛЫНАМ ТўНЯШКЕ</b>	
13:00	И.Соловьёвын лўмгече касше	12+
27	<b>МЫЙ ПÖЛЕКЛЕМ ЫЛЕ..</b>	
16:00	Вячеслав Абукаев-Эмгакым шарныме лўмеш концерт	12+

shketan.ru/afisha

Рекламе.

«Ямде лий» газет  
Тўн редактор  
Л.Н.ГРИГОРЬЕВА.  
Индекс: П4696.  
Тираж 1550 экз.  
Заказ  
Формат – А-48.

https://vk.com/yamde\_lii  
https://t.me/yamdelii  
E-mail: yamde\_lii@mari-el.ru  
(документ кагазлан),  
yamde\_lii@mail.ru  
(автор-влаклан)  
Сайтын адресше: ямделий.рф

**УЧРЕДИТЕЛЬ:**  
Марий Эл Республикысе Тўвара,  
печать да калык-влакын пашашт  
шотышто министерстве.

Газетым редакцийыште погымо да верстатлыме, «Марий Эл Республикысе Правительствын типографийже» ООО-што ямде оригинал-макет гыч савыктыме. Типографийын адресше: 424000, Йошкар-Ола, Комсомольский урем, 112.

Газетым Кыл, информационный технологий да массовый коммуникаций сферым эскерыме шотышто федеральный службын Юл кундем федеральный округысо управленийыштыже регистрироватлыме.  
Номер – ПИ № ТУ52-01404,  
2023 ий 22 сентябрьыште пуымо.

0+

Печатьш пуымо жап –  
14-00,  
фактически – 13-00

Авторын да редакцийын шонымышт тўрлö лийын кертыт. Серыш-влак мөнгеш огыт колталт.  
Ак – кутырен келшыме почеш.

Редакцийын да издательнын адресше:  
424006, Йошкар-Ола, СССР Вооружённый Вийын 70-ше идалыкше урем, 20-шо пöрт.  
Тел. 8(8362) 45-22-82.



Коктын але шуқынрак модаш лиеш.  
 Қубикым кудалтыза, тушто мынар точко – тунар ошкыл.  
 Кө финишш эн ондак миен шуэщ, тудо сеньше лиеш.

	Кок гана кошт.		Черетым весылан пу.		У ий нерген мурым муралте.		Кыша дене кай.
--	----------------	--	---------------------	--	----------------------------	--	----------------